



10 Mei 2021

Ogen: Perngandungen 3:1-21



Nginem Inemen Si Pagit



Salah sada kebiaren man manusia eme perubahren. Umpamana adi kune gelgel kita sehat maka mbiarkal me kita adi reh pinakit man banta. Adi kune gelgel lit rumahta maka mbiar kal me kita lanai lit inganta tading. Malah perban biarna manusia nandangi perubahren iupayakenna banci min ia tetap bagi si gelgel. Umpamana gelah tetap teridah nguda, iupayaken manusia ndai me alu erbage cara. Lit alu erolah raga, lit alu diet, lit alu minem jamu gendong ras si debanna.

Kenca bangsa Israel i buang ku Babil maka jadi me perubahren man bana si luar biasa. Daging kula enggo reh kotena, ingan tading pe lanai lit, jelma si enterem pe nguru-nguru, ersembah man Tuhan pe lanai banci piah enggo lupa pe ia erti mejuah-juah. Enda nuduhkan uga kelekna perbeben si inanamina.

Amin bage gia kelekna perbebenna, lit ayat i jenda si nuriken sada komitmen man bana ras teman sebangsana eme ayat 25, 26, TUHAN mehuli man kerina kalak si ernalem man baNa, Emaka madin kita megenggeng nimai IA nampati kita. Arah ayat si idah maka lit kesimpulan kegeluhenna maka Tuhan me jabab kerina perbebenna enda. Adi mulih ia ku Tuhan maka lit i je serpang pulah si idatna idur Dibata nari.

Bage me pe man banta genduari maka sada perkara si la banci la terjadi eme perubahren i bas kegeluhen enda. Megati perubahren maba mesui ateta desken minem inemen si pagit. Tapi arah ogenta sendah i baba kita ku bas jabab si penting si inget lalap eme maka "madin megeng. Megenggeng labo ertina sinik saja la erbahan kai pe, bagi nimai kuah maler, tapi ngelakoken si mehuli singena ate Tuhan. I bas ndalani kiniseran, nuluh mulihi ku bas keleng ate Tuhan janah ngarapken kekelengenNa e seh man banta .



15 Mei 2021

Ogen: Perngandungen 5:11-22

Baba Kami Mulih Ku Kam



Adi si inget perumpamaan anak si bene si ituriken Jesus i bas Lukas 15, maka kiniseran si inanami anak ndai i taneh perlanjangan erbahanca turah ukurna mulih ku rumah bapana si dem alu erbage si mehuli. Bage me gambaren kecibal kegeluhen bangsa Israel si ibuang ku Babil, maka kiniseran si inanamina mpeturah ketedehen atena mulih ku negerina jine. I bas kegeluhen enda sanga kerina erdalan alu mehuli, banci biasa-biasa siakap nanamna. Tapi bage lanai erdalan bagi arusna maka i je mulihken ateta ku bas kegeluhen si ndube. Kinisuin ate bangsa enda iturikenna tole i jenda eme uga ndeharana iperkosa, anak-anakna ipaksa erlagu la uli. Pemimpin-pemimpin pe lanai lit ergana. Erdandaken si e maka mesui kal ate bangsa enda i taneh pembuangan. Si enda me pe si erbahanca mulih atena ku negerina. Sura-surana enda pe ipesehna man Tuhan nina, Tapi Kam Tuhan raja rasa lalap si merentah terus ku bas paksa-paksa. Ertina iakuina maka Dibata eme si tahan rasa lalap, si la pernah salih kuasa ras keleng ateNa. Ipindokenna pe i bas ayat 21, baba kami mulih ken.

Mulih ku kutana jadi sada ketedehen ate bangsa enda. Metedeh atena kegeluhen i Jerusalem bagi si nai. I Je banci ia rende muji Tuhan i bas rumah pertoton, banci erdahin alu bebas ras la lit si mperbudaksa. Lit erga dirina jadi bangsa si mbelin. Situhuna bangsa e enggo erkadiola sebab ndube sanga tading i jah lupa ia nggeluh bujur ras ngatakan bujur man Dibata. Metenget kita genduari pe maka ula kita lupa nggeluh ngenanami kiniulin Tuhan, arah ibadahta, arah kita ndalanken si ngena ateNa. Nanamilah tupung banci denga rende muji Tuhan. Sabab lit paksana lanai kita ngasup.



16 Mei 2021

Ogen: 2 Korinti 9:13-15

Tole-tolenlah Dahin Gereja



Beluhkal Paulus mereken penjemba man Perpulungen Korinti. Kususna kerna nampati Perpulungen Judea si paksa si e ngenanami kiniseran si mesangat. Ieteh Paulus maka Perpulungen Korinti enda sada perpulungen si pelit. La seri ras Perpulungen Tesalonika ras Pilipi si melumbar i bas nampati teman. Labo perban susahna maka ia pelit tapi biak enda si tuhuna erdandanken lenga nggeluh Kata Dibata alu mehuli i bas pusuhna. Adi soal kecibal kegeluhen ndauh lebih susah kegeluhen Perpulungen Tesalonika, tapi kinitekenna erbahanca maka meriah ukurna guna nampati kalak si deban.

I bas kecibal Perpulungen si bagenda maka mejile kal kata-kata Paulus man bana nina, teridah kam menang soal nampati. Janah erkiteken penampatndu e enterem pagi kalak muji Dibata. Kata-kata enda eme kata-kata penjemba gelah turah semangat perpulungen enda guna nampati temanna si deban si sangana i bas kiniseran.

Paksa genduari pe erbage kecibal perpulungennta i bas mere ras nampati kalak si deban. Lit si enggo seh ku bas kedewasan kinitekenna maka tupunga ia mere lanai bo ia perlu ieteh kalak, tapi kai si banci ilakokenna, maka idalankenna alu ukur si meciho. Tapi enterem denga ka nge perpulungenta arus ijukjuk maka kebacihen. Malah si parahna ijukjuk pe deba la kebacihen. Si enda si tuhuna sebabna eme hubungenna ras Tuhan. Uga perkinitekenna man Tuhan maka bage nge pengelokenna arah perbahanen. Kalak si enggo turah kinitekenna maka tole-tolen ia ndahiken dahin Tuhan.

Wari enda si baba ku bas pertoton safaatta kerna MUPEL Moria GBKP gelah banci ilakoken secara virtual tgl 17,18 Mei 2021 ras erdalan kerina alu mehuli. I bas kita muat bagin notokensa pe kita enggo atan muat bagin ndahiken dahin gereja.







Blank writing area with a light blue background and a wavy top edge.



Blank writing area with a light blue background and a wavy top edge.